


Beibl i Blant yn cyflwyno



Stopio
erlid a
dechrau
dysgu am
Iesu




Awdur: Edward Hughes
Lluniau gan: Janie Forest
addaswyd gan: Ruth Klassen
Cyfieithydd: Catrin Roberts
Cynhyrchwyd gan: Bible for Children
www.M1914.org

BFC
PO Box 3
Winnipeg, MB R3C 2G1
Canada


©2016 Bible for Children, Inc.

Trwydded: mae gennych hawl i gopio neu argraffu'r stori hon,
ar yr amod nad ydych yn ei gwerthu.c




A simple line drawing of a tree trunk with a hand holding a branch. The tree trunk is on the left, with a hand reaching out from the right to hold a branch. The branch is decorated with small diagonal lines. The background is plain white.

Roedd Duw yn
gwneud pethau
mawr trwy'r
eglwys ifanc.



Roedd un dyn, Philip,
yn brysur iawn yn
dysgu pobl mewn
dinas brysur am Iesu.
Ond cafodd ei anfon
gan Dduw i'r
anialwch. Pam?





Roedd Duw yn gwybod fod teithiwr yn croesi'r anialwch - un o swyddogion Candace, brenhines Ethiopia. Roedd e'n mynd adref ac yn darllen llyfr arbennig.

Allwch chi ddyfalu pa lyfr?





Fe wnaeth Philip ufuddhau i Dduw,

ac fe
gafodd ei
arwain yn
syth at y
swyddog
oedd yn
darllen Gair
Duw. Ond
doedd e ddim yn
ei ddeall. Gofynnodd
i Philip eistedd yn y
cerbyd gydag e.




"Beth ydy ystyr hyn?" gofynnodd y swyddog i Philip. Wrth i'r cerbyd deithio ar ffordd yr anialwch, dyma Philip yn dechrau gyda'r rhan honno o'r ysgrifau sanctaidd a mynd ati i ddweud y newyddion da am Iesu wrtho.






Mewn
ychydig amser
roedd y swyddog o
Affrica yn credu neges y
Beibl, mai Iesu Grist yw Mab
Duw. Wrth weld ychydig o ddŵr,
dywedodd, "Oes yna unrhyw reswm
pam ddylwn i ddim cael fy medyddio?"



Atebodd Philip, "Os wyt ti wir yn credu, fe gei di dy fedyddio." Dywedodd y swyddog, "Rydw i'n credu mai Iesu yw Mab Duw." Aeth gyda Philip i lawr i'r dŵr ac fe gafodd ei fedyddio.






Wrth iddyn nhw ddod allan
o'r dŵr, dyma Ysbryd yr
Arglwydd yn cipio Philip i
ffwrdd. Wnaeth y swyddog
o Affrica mo'i weld ar ôl
hynny. Aeth yn ei flaen ar
ei daith i
Ethiopia
yn llawen.



Ond roedd rhai pobl yn casáu'r Cristnogion. Roedd Steffan, un o ffrindiau Philip, wedi cael ei ladd gan dyrfa o bobl oedd ddim am ei weld yn siarad am Iesu. Cawson nhw help gan ddyn o'r enw Saul o Darsus. Roedd yn gas gan Saul unrhyw Gristion.



Roedd Saul yn mynd o gwmpas
yn bygwth lladd Cristnogion
ac aeth at yr Archoffeiriad i
ofyn am lythyrau oedd yn rhoi
hawl iddo arestio unrhyw un
oedd yn dilyn Iesu.






Druan o Saul o
Darsus! Doedd
e ddim yn
sylweddoli ei
fod e'n rhoi
loes i'r Iesu
wrth roi loes i
bobl Dduw.
Roedd yn rhaid
i Dduw stopio
Saul. Ond sut?



Dyma Duw yn
'arestio' Saul! Pan
oedd Saul yn teithio
i ddinas Damascus,
fflachiodd golau
disglair o'r nefoedd.
Syrthiodd Saul ar
lawr. Yna dyma fe'n
clywed llais yn
siarad.






"Pwy wyt ti, syr?" gofynnodd Saul.

"Iesu ydw i, yr un rwyt ti'n ei erlid." Yn crynu mewn ofn, gofynnodd Saul, "Beth wyt ti am i mi wneud?" A dywedodd yr Arglwydd wrtho, "Cod ar dy draed a dos i mewn i'r ddinas. Cei wybod yno beth mae'n rhaid i ti ei wneud."




Roedd y dynion
oedd gyda Saul
hefyd yn clywed y
llais ond doedden
nhw'n gweld neb.
Cododd Saul ar
ei draed - a
sylweddoli ei
fod e'n ddall.
Dyma nhw'n ei
arwain i mewn i
Damascus.




Arhosodd yn Damascus am
dri diwrnod. Roedd e'n
ddall ac yn gwrthod
bwyta nac yfed.


Tybed a wnaeth e
ddefnyddio'r amser
i siarad gyda'r
Arglwydd Iesu
oedd wedi dod
i'w gyfarfod
ar y ffordd i
Ddamascus?



Roedd Duw wedi cynllunio popeth.
Roedd dyn o'r enw Ananias
yn byw yn Damascus.
Anfonodd yr Arglwydd e
i helpu Saul. Roedd gan
Ananias ofn. Ond
roedd yn ufudd i
Dduw. Pan roddodd
ei ddwylo ar Saul,
dechreuodd
weld eto ac
fe gafodd ei
lenwi â'r
Ysbryd
Glân.




Cafodd Saul ei fedyddio. Yna
cymerodd rywbeth i'w fwyta.
Ar ôl bwyta, roedd yn teimlo'n
gryfach. Roedd Saul angen
bod yn gryf- roedd gwaith
pwysig iawn o'i flaen.



Aeth ati ar unwaith i bregethu yn y synagogau mai Iesu ydy Mab Duw. Roedd pawb wedi'u syfrdanu, ac yn dweud, "Nid dyma'r dyn oedd yn gwneud drwg i'r Cristnogion?"

Dyma rai yn gwneud cynllwyn i ladd Saul.





Roedd gelynyion newydd
Saul yn gwylio giatiau'r
ddinas er mwyn lladd
Saul wrth iddo adael y
ddinas. Ond fe wnaeth
ei ffrindiau newydd, y
Cristnogion, ei ollwng i
lawr waliau'r ddinas
mewn basged.





Ac ar ôl hynny? Fe
wnaeth Saul, prif
erlidiwr y Cristnogion
fyw fel disgybl
ffyddlon i'w Feistr
newydd, yr
Arglwydd
Iesu Grist.



Stopio erlid a dechrau dysgu am Iesu

Stori o Air Duw, y Beibl


sydd i'w gweld yn

Actau 8-9

"Pan ddatguddir dy air, bydd yn goleuo."

Salm 119:130





Y Diwedd



Mae'r stori hon o'r Beibl yn dysgu ni am ein Duw rhyfeddol.
Fe wnaeth ein creu ni, ac mae eisiau i ni ei adnabod.

Mae Duw yn gwybod bod ni wedi gwneud pethau drwg, beth mae e'n galw'n bechod. Cosb pechod ydy marwolaeth, ond mae Duw yn dy garu di gymaint nes ei fod wedi anfon ei unig Fab, Iesu, i farw ar Groes, a chymryd y gosb am dy bechod di. Yna daeth Iesu'n ôl yn fyw a mynd adref i'r Nefoedd! Os wyt ti'n credu yn Iesu ac yn gofyn iddo faddau dy bechodau, mae'n barod i wneud hynny! Bydd yn dod i fyw ynot ti nawr, ac fe gei di fyw gydag E am byth.

Os wyt ti'n credu bod hyn yn wir, beth am ddweud hyn wrth Dduw: Annwyl Iesu, rwy'n credu i ti ddod yn ddyn i farw dros fy mhechodau, a dy fod ti'n fyw eto. Os gweli'n dda, tyrdd i mewn i'm bywyd. Maddau fy mhechodau i mi gael bywyd newydd nawr, ac yna un diwrnod bod hefo ti am byth. Helpa fi i fod yn ufudd i ti, a byw fel plentyn i ti. Amen.

Darllena'r Beibl, a siarad gyda Duw bob diwrnod! Ioan 3:16

